

# Kayëta iŷanar ir Timote

## Lilaya in

Akayëta aŷo ro, Pol ŷëgwën baŷo Timote, ar enga emat gë gër andiyen and Kaxanu an. Gër akayëta aŷo osëŷali or Pol ol ex: end bësëŷali bënëgwêš eŷ; gë end ang ŷapëk ecale ak; do gë end ang ŷapëk exo điyand alëngw ar Amara ak.

Er ex gër akayëta in:

End aniyen and gër Amara eŷ: 1.1–3.13.

End ekwëta ed đal eŷ do gë end osëŷali or enëgwêš eŷ:  
3.14–4.5.

End bapela band bëlëngw bër bamara eŷ: 4.6–6.21.

## Ecëmar el

**1** <sup>1</sup> Wëno Pol kë ŷëgwëlinde kayëta iŷo ro. Parëxanda ir \*Yesu \*Kërisët hi këme ang re këni Kaxanu, mëŷ ar fexën këbo an, do gë Kërisët, ar këñëŷo yarënde an. <sup>2</sup> Wëŷ Timote këmi ŷëgwënëlinde, wëŷ ar hik enim asëñiŷwën ga bar ke ako ekwëta edebat. Awa Faba Kaxanu do gë Yesu Kërisët Axwën arebi an, yëlëleni oyekax ol, axaŷënan in do gë obetak ol!

## End bësëŷali bënëgwêš eŷ

<sup>3</sup> Në ekwitan emi end fel bami đamana me ŷ'exën gër ebar ed Masedëwan eŷ mëne eŷ baya na gër Angol and Efes do eŷëbi dexërand bërëmar eni teb osëŷali or bënëgwêš ol. <sup>4</sup> Pelindëbi eni teb ebalëkënali ed bendacan el, do gë end omac or gër bandëwëra band këni reŷarand gë eŷata këm eŷ. Beŷo ecampëre fo kë wëlawënd. Beŷo ala aŷo dëcand na exo kemëna emelëya ed ŷenene ed bend Kaxanu, ar gë ekwëta. <sup>5</sup> Er këme ŷaland gë apela aŷo in ex, ebalër ed gë oŷëkw oŷënëk el, gë onden onjekax, do gë ekwëta ed đal. <sup>6</sup> Bërëmar ga langangan këni beŷo, nambëraxën këni gër oyeyandëran or gë ofëcak këm. <sup>7</sup> Arafëna këni rafënande mëne bësëŷali bër \*acariya and Moyis hi këni xarak abi pëni ex na er këni sëŷalinde in, bëte abi pëni ex na er këni balëkënalinde edeyara in.

<sup>8</sup> Aye nang këne mëne acariya aŷ er ŷenene ex angëmëne eŷ tëfënd ang kë rend ak. <sup>9</sup> Nangëne mëne er kë rend acariya in bësëxwëpëtaxik bën, gë bëwëšik bën, gë bësëmbak bën, gë bëwëndëran bën, gë bëyepën bër bend Kaxanu bën, gë bëlaw bër

bëxarëk bërebën bën, do gë bëlaŵ bër bela bën këbi rend. Abi dend na bër ſenene bën. <sup>10</sup> Bëte afaŵ faŵ këbi bër yëlayand gër eñac bën, gë bër kë rind asoſan gë asoſan, er këni rind asoſan gë asoxari in, gë bëfan bër okadëp bën, gë bëñëgwëſ bën, gë bër kë yaſarënd gër enëgwëſ bën, do gë ðek bër hëpëk osëŷali or ðal bën. <sup>11</sup> Eño kë rend Atëfëtan and xwëtënan ke aŋ, and enjaran end Kaxanu, mëñ ar gë onënga aŋ.

End oyekax or Kaxanu eñ

<sup>12</sup> Wëno gë emëkw edam el ðek këmo ſëkwand \*Yesu \*Kërisët, Axwën arebi an, mëñ ar yël ke ojaŵ od me dixënënd andiyen andexëm an. Gayik axwëta xwëta ke sebënanaxën ke andiyen aŋo. <sup>13</sup> Damana exe tanaxën Axwën an gër andiyen andexëm aŋo, wëno aſir bamo ſirënd, arixëra bamo rixërand, abamo baxëtën na. Barikan mëñ lëkaya baxe gë axaŷënan isëm ado bayik amo kwëta bana, abame nang na mëne në emenan emo, në end oñëpëgënan od lëb bax gër emëkw edam ok. <sup>14</sup> Ata Axwën arebi an, mondako xureli këño gër ndam oyekax ol, gë ekwëta el, do gë aŋana and gër Yesu \*Kërisët aŋ. <sup>15</sup> Eyeŷan elo ed mokwëta ex do ed ŷapëk momëxwëta: \*Yesu \*Kërisët aŷow ŷow baxo gër ngwën ebi pexën bëwëndëran bën do wëno ex ar xurik me mendëra an. <sup>16</sup> Barikan Kaxanu gë axaŷënan wëlaya ke ex canayaxën gër wëno awendëran aſëm ajo ðek ebuña ed Yesu \*Kërisët el, ang amatinali and bër këño xwëta eni cotaxën aniyen and din aŋ.

<sup>17</sup> Ar wunëk nand ex yo an,  
ar ax cësënd na an,  
ar anëño watënde na an,  
ar ex gabat Kaxanu an,  
xwënëk owëlik ol do gë enjaran eñ din ir din! Amen!

<sup>18</sup> Asëñiwën Timote, apela and këmi sebënanënd aŋ andamat ex gë bend reŷa këni anëka bëlaŵënel endey eñ. Awa wëñ kwitayind eyeŷan elo ey kemëanaxën ang ar okaxër fo. <sup>19</sup> Mëlayal ekwëta ed xwëta këŷo Kaxanu el, bëte bayilexi onden onjekax. Onden onjekax oño bërëmar abi bo ex na, do në eño lapaxën këni ekwëta ed Kërisët el. <sup>20</sup> Gër enga eño hi këni Imene do gë Alekësandër. Mëñ lëxwaxën këmëni gër Sindan eni tëŷaxën mëne ax gi ex na mocir Kaxanu.

End cale eñ

**2** <sup>1</sup> Awa ga re këme damana beño ðek, kemënayindën cale iñ, karayindëno Kaxanu, caleyindëno, këlayindëno do

cëkwayindëno në end bela dek. <sup>2</sup>Calenindënëbi bemun bej do gë dek bër ex bëlëngw bën, ene diyaxënënde aniyen and gë aketëxeta, and gë emer këm, ene balëkënalixënënde end Kaxanu enj, do ene diyaxënënde ang yäpëk ak. <sup>3</sup>Enjo aye yek do ahan han ko Kaxanu, Afexën arebi an, <sup>4</sup>mëj ar yandi këjo eni pex dek bela an do eni njatën enang ed end dal el.

<sup>5</sup>Enimin, Kaxanu íbat fo ex, bëte ahatelindër ar Kaxanu gë bela abat fo ex, mëne ngëj ala ar këno wacënd Yesu \*Kërisët an.

<sup>6</sup>Ayëlaya yëlaya ko mëj dëj akanji ebi dacëtaxën dek: osede olo wäsin këbo nand yäpëk na mëne Kaxanu yandi këjo eni pex dek bela bën.

<sup>7</sup>Në enjo yataxën ke Kërisët me gi afemëra, parëxanda do asëy'ali bër benëng becëxe eni gixën gër ekwëta do gër dal. Er këme rend ijo dal ex, ame nëgwëšënd na.

<sup>8</sup>Awa er yandi ke gër ed ex yo, bësošan bën eni yënënd otaxan omënëk, eni calend gë emëkw epešax, gë oxoÿ këm do gë ecampëre këm.

<sup>9</sup>Er yandi ke bëte, bësoxari bën eni cudarand šenene, këreni cudand na banjëm band xaw. Këreni njanarand na gë bamël, këreni bakarand na kaŋe, gë oyeri, do gë bebër xemëk akanji.

<sup>10</sup>Barikan gër oye orebën watindëlex bandixa banjekax ang yäp këbi bësoxari bër fëb këjo Kaxanu. <sup>11</sup>And këni sëyalind aŋ, bësoxari bën cësinayindëlexëni do eni baxëtënd aye. <sup>12</sup>Asoxari an cësinayindëlexo, amo yël ex na or gapak or exo tëyalind ol, amo yël ex na enjo bëñand asošan an. <sup>13</sup>Enimin Kaxanu, Adam yana këjo ebaÿ el, bayaxën këjo Xawa. <sup>14</sup>Do šabucara in wa yifa këjo asoxari an exo dëngw gër emëšen ed Kaxanu, aŋo yifa ex na Adam, asošan an. <sup>15</sup>Barikan fo afex ko fex, ga rëw rëw ko angëmëne exo bayi gër ekwëta, gër ebal ed bela, gër eyëlaya ed gër owënëk, do gër ebana.

### End bëlëngw enj

**3**<sup>1</sup>Eyeyan elo ed mokwëta ex: asošan ar yandi këjo enim exo gi alëngw gër Amara an, andiyen anjekax yandi këjo exo dind.

<sup>2</sup>Awa aÿap yäpëk, alëngw an exo gi ar gë end këno nëp këm, icën ind asoxari abat, ar gë anjus, ar ye këjo onden, ar šenene, ar këbi xwëtayand aye bëliyer, ar xamëk osëy'ali. <sup>3</sup>Gilexo ar bëngw këjo onden, ar këni wëlërënd gë bela, ar kë xwëyëtand aŋana and kodí, kërexo gi na ašëb, kërexo gi na axeÿax. <sup>4</sup>Kadacindëlexo aye ekun edexëm el, do obaš orexëm ol eni gi bër kë baxëtënd apela ang yäpëk ak. <sup>5</sup>Enimin, angëmëne ala axo kam ex na ekadac

ed ekun edexëm el mondake cëŋ ko wëlaya Amara and Kaxanu aŋ? <sup>6</sup> Alëngw an, kërexo gi na de ar wäk ecede end \*Yesu këdi këŋo fufën ndafënan iŋ do exo gi ar këŋo nëp Kaxanu andamat gë šabucara in. <sup>7</sup> Aÿap ÿapëk bër ax gi ex na okëreceŋ bën eni deyand osede oyekax end ola orexëm eŋ, këdi kë nëxena oŋac orexëm ol, do eŋo tëra šabucara in gë bamene bandexëm baŋ.

End ojakër eŋ

<sup>8</sup>\*Ojakër ok bëte aÿap ÿapëk eni gi bër mopëb, bër ax gi ex na gë odëxas oki, bër abi kurelind na ngoŋ iŋ, do këreni gi na bër kë šotënd kodı gë enëgwëš. <sup>9</sup> Aÿap ÿapëk eni mëlayand end ekwëta end šonët ko Kaxanu gë onden onjekax eŋ. <sup>10</sup> Canayalex pere gër bandixa bandebën mène bër šenene exëni eni ñanaxën andiyen and ojakër aŋ, angëmëne gë end këñëbi nëp këm exëni. <sup>11</sup> Bëte bësoxari bër ex ojakër bën aÿap ÿapëk eni gi bër mopëb, bër gë anjus, bër mokwëta gër beŷ dek, këreni gi na bëxapëndër. <sup>12</sup> Jakër in gilexo icën ind asoxari abat, kađacindëlebi šenene obaš orexëm ol, do mëlayayindëlexo aye ekun edexëm el. <sup>13</sup> Ojakër od kë rind šenene andiyen andebën ok bër gër amara bën dek afëb këñëbi fëbënd, do axor këni xorënd eni yeyan gë or gapak osëm end ekwëta ed bar këbo gër Yesu Kërisët eŋ.

End ekwëta eŋ

<sup>14</sup> Timote, mondako këmi ÿëgwënëlınd kayëta ijo ado ga këme yarënd mi nëngali gogo dëŋ. <sup>15</sup> Bari angëmëne ame ŷeli ex na gërëgako, anang nang këŷ ang ÿapëk eŷ diyand gër ekun ed Kaxanu ak. Ekun elo ex Amara and Kaxanu and wëlayak dal aŋ, ang xëcar ir aciŵ fo. <sup>16</sup> Endey end \*Kërisët end šon baxo Kaxanu elod ga ŷanak ngwën aŋ cëŋ, iyo aÿap ÿapëk enang ed mène mbaŋ rafëk el:

Kërisët šanayaw bax gë eman,  
 Angoc Amënëk aŋ wasin këbo mène ar šenene ex,  
 gër omeleka šanaya ko,  
 endexëm eŋ sëfët këni gër benëng bend bela,  
 bër anjëm wäk endexëm eŋ gër ngwën,  
 Kaxanu wëla këŋo gër orën gë enjaran eŋ.

End bësëŷali bër benëgwëš eŋ

**4** <sup>1</sup> Barikan Angoc and Kaxanu aŋ rek kerët mène gër bakey bapelatar, bërëmar aŷepan këbi ŷepan ekwëta ed \*Kërisët el do eni kwënda etëf ed bend bangoc band këbi nambelind bela, do gë osëŷali or bend bëyël. <sup>2</sup> Bën ex bër kë wänd enëbi yifa

bëyënjënaç bër kë labayand bën, gë bënëgwêš bën, do gë bër šor këñëbi gër onden gë endun end lëxw bani xali warëk bën<sup>a</sup>. <sup>3</sup>Bela bëjo kë sëyalind mëne bërëwäk end Yesu do nang këni đal bën këreni ñërënd na, bëte këreni yambënd na bebërëmar xarak Kaxanu rik eni yambënd do eno cëkwand. <sup>4</sup>Đek er ri ko Kaxanu in aye yek, yoweỹ ax gi ex na er monap angëmëne ašëkwa këno šëkwand en yambaxën. <sup>5</sup>Enimin, er ex yo kë wënënd gë eyey'an ed Kaxanu el do gë cale inç.

End ola or ariyenin ar Kërisët eñ

<sup>6</sup>Angëmëne baçela baño këyëbi sëyalind bëmaỹe bëñ, ata key hi ariyenin ayekax ar Yesu Kërisët. Mondako kë šanaya gër ola oreỹ mëne bend ekwëta beñ do gë osëy'ali or këy sëfënd din ol ang eyamb yamb fo hik gër aniyand andey. <sup>7</sup>Barikan cusëlëbi bër kë sëyalind bendacan bend kë yepënënd bend Kaxanu bën gayik bësoxari bëxarëk këbi balënd bendacan beño. Kemënal ey điyand ang yäpëk exo điyand ar këño balënd bend Kaxanu ak. <sup>8</sup>Edi ed bebër kë bëngwënënd eman el ofëcäk dëñ exëna. Barikan ofëcäk or ar këño balënd bend Kaxanu ol xucak ex këbën. Gayikwa Kaxanu abey'a bey'a këño ar kë rind mondako an aniyand and gërëgako añ do gë and kë yowënd añ. <sup>9</sup>Eyey'an elo ed đal ex, ed mokwëta aye ex. <sup>10</sup>Biyi asoro këne soronde gër andiyen, axemëna këne xemënande gër ekwëta, ang bër okaxër fo gayik ayar këñëño yarënde Kaxanu, mëñ ar gë aniyand an, adofa đek đek in bërëwäk endexëm bën.

<sup>11</sup>Ata beño yäpëk eyëbi pelënd, do eyëbi tëyalind eni dind.

<sup>12</sup>Awa wëj cëñ, gil ar šenene, do bërëwäk bën korindëlexëni eni tëfëteli: eyey'an edey' el, gë bandixa bandey' beñ, gë aņana andey' añ, gë ekwëta edey' el, do gë owënëk oreỹ ol. Gayik šambenjar fo bayi këy', ala kërexi yaf na. <sup>13</sup>Xali yatir këme yeli, balëkënalind opën od akayëta and Kaxanu ok gër Amara. Pelindëbi eni kemëna gër etëf ed er këni wëlelind in bëte kemënal eyëbi tëyalind.

<sup>14</sup>Anjëla and re baxo alawënel mëne Kaxanu yël ki në end oyekax orexëm añ, ašot šot këy' and xwëtan këni otaxan, do šalen këni enga end bëlëngw bër gër Amara eñ. Do wëj kërey' đangangan na.

<sup>15</sup>Balindëlexi mbañ beño, yëlayal gë emëkw el đek gër andiyen andey'. Ata këni yana eni watënd bër gër Amara bën đek mëne ola oreỹ ol ang këño yapanënd Kaxanu ak dëñ hik. <sup>16</sup>Titinalind aniyand andey' añ do gë osëy'ali oreỹ ol. Balëkënalind beño đek.

<sup>a</sup>4.2 Amëd aņo, mondako banëbi šorënd bëlaw bër bela bën do gë okadëp od babi nawand bëxwën bërebën ok ang këñëbi rind oxey' nanganëme fo ak.

Enimin, angëmëne mondako këy rind afex kën feX wëj, do gë bër ki baxëtënd bën.

End bapela enj

**5**<sup>1</sup> Ar xarëna ki gër Amara an, pelëralo ang sorix fo, këreyëño dexëra na kwëlay-kwëlay. Do ocambenjar ok, pelërayindëbi ang bëmaÿe fo. <sup>2</sup> Asoxari axarëk an, pelëralo ang norix fo, do bësoxari bëbeja bën, pelërayindëbi gë owënëk, ang bëmaÿe fo.

<sup>3</sup> Dëcarayindëbi bësoxari \*bësebëta sebëta bën angëmëne ani gi ex na gë ar këbi rëcarand. <sup>4</sup> Angëmëne asoxari asebëta sebëta an gë obaš exo ba gë ejiw bën exo, bën tÿalexëni emëlaya edexëm el. Mašëindëlenëbi bëxarëk bën edëba ed lëba kënëbi el eni wataxënënd bër hi këni ekun ebat bën ekwëta edebën el gayik enjo këño nënganënd Kaxanu. <sup>5</sup> Ar hik enim asoxari asebëta sebëta an, ar bayik gabat an, ajo ex ar këño yarënd Kaxanu an. Ciš wec xemëna ko cale inj do gë okar od enjo dëca ok. <sup>6</sup> Barikan asoxari asebëta sebëta, ar xwëndak amëkëña and gë bësošan an, anëka nemi ko ado ga bayi ko mopër. <sup>7</sup> Enjo ÿapëk eyëbi pelënd bësoxari bësebëta sebëta bën eni dÿaxënënd gë end kënëbi nëp këm. <sup>8</sup> Angëmëne ala enjo key emëlaya ed bërexëm el, adofa bër ekun edexëm bën, anëka lap ko ekwëta edexëm el, anëka ÿëñen ko nëmëc gë ar elod axo gi ex na këreceñ an.

<sup>9</sup> Eno nëgwaxën asoxari asebëta sebëta an gër akayëta and bësoxari bësebëta sebëta, təkëleño pere bëniy ofëxw ocongebat do gilexo ar ÿër baño asošan abat fo. <sup>10</sup> Bela bën deyayindëlexëni mëne ari baxo rind benjekax beño: aye babi wëlayand obaš orexëm ol, gë emëkw epešax babi xacand bëliyer bën, anebën babi nebënënd osapar oñ bërëwäk bën, arëcara babi rëcarand bër šëmura këbi bën, do benjekax bend ex yo baxo rind.

<sup>11</sup> End bësoxari bëbeja bësebëta sebëta enj cëñ, aÿandi këbi ÿandid enëbi nër gašëxe, do eno teb Kërisët. Men ex, këreyëbi nëgwënd na gër akayëta and bësoxari bësebëta sebëta.

<sup>12</sup> Bësoxari bësebëta sebëta bër sebëk eyëla eñanar ed yëlaya bani el monëp exëni. <sup>13</sup> Mondako hixën këni bëxwëlaraxik, do këni sëfërand bëciw bëñ gë omëkara. Bëte er xurik ex nënëñ in ex, ga wata këni eyeyan gë ofëcak këm el, do gë edil ed gër bend ax gi ex na bendebën el. <sup>14</sup> Awa wëno er këmëni xaranënd bësoxari bëbeja bësebëta sebëta bën enëbi nërënd gašëxe, enëbi cotënd obaš, do eni mëlayand šenene ekun edebën el, këdi këni šot bërangoÿëra andëbi bën er kënëbo renaraxën. <sup>15</sup> Bërëmar cëñ anëka šapa këni do këno sëfënd Sindan in. <sup>16</sup> Angëmëne asoxari arëwäk ebi cot bësoxari bër nëng irexëm bësebëta sebëta,

kemënalexo ebi dëcarand këdi këbi lenga emëlaya edebën el bër gër Amara bën do eni təkwan edëcaran ed bësoxari bësebëta sebëta bër ax gi ex na gë ar këbi rëcarand bën.

End epëb ed bëlëngw bër Amara eņ

<sup>17</sup> Bëlëngw bër Amara bër kë xadacënd šenene bën, aņap ŷapëk enëbi pëbënd do enëbi dëcarand adofa bër xemënak gër epemëra ed end Kaxanu do gër osëy'ali bën. <sup>18</sup> Ga rek wa Oñëgw Omënëk ok:

«Këren kapënd na etëy ed engaš end këņun wëñënd bële eņ.»

Do

«Ar kë riyenind an ŷap këņo acosa aņ<sup>b</sup>.»

<sup>19</sup> Ar këņo lëxwënd alëngw ar Amara xarak axo gi ex na gë otede oki ba otas, kërey'ņo yaka na. <sup>20</sup> And ko wëndëra ala gër Amara aņ, dexëralo poyoma eni yëdaraxën bëte bër bayik bën.

<sup>21</sup> Axara xara këmi gë obal osëm, gër lëngw ir Kaxanu, gër ir Yesu Kërisët, do gër ir omeleka omënëk: tanal ey' dind dek bebër këmi felënd bëjo, do ŷoweŷ kërey' dind na gë epitëndër ed bela.

<sup>22</sup> Kemënal wëj dëņ ey' gi din awënëk fo. Kërexixi nëkanënd na etana ed ala mokwëtan otaxan exo gixën alëngw el, gë ala këren bar na gër beñëņenax bëndexëm. <sup>23</sup> Gayikako laņ ki ŷambënënd acël aņ xali ey' daki, cebind təkër ngoy' iņ, tebël eceb ed wayët men fo el.

<sup>24</sup> Na fo exëni bër gë bamena band wat-wat d'amana kiti ex gixën indebën iņ. Bëte na fo exëni bër kë šonënd bamena bandebën do and kë nëka aņ fo kë šanayand. <sup>25</sup> Andamat ex gë bandixa banjekax baņ: band ax watind na atañ baņ dëņ ax bayi na ga šonayak.

End okadëp eņ

**6** <sup>1</sup> Dek bër ex gër oxadëp bën, pëbindëlenëbi mbaņ bëxwën bërebën bën aņ ŷapëk ak, mëņ bayik bër fac bën ani denara na o'wac or Kaxanu ol, ani ŷepën na osëy'ali orebi ol. <sup>2</sup> Bërëw'ak bër ex okadëp bën kërenëbi yafënd na bëxwën bërebën bën ado ga hi këni bëmaŷe bëndebën gër ekwëta. Bëte gayikako bën bërëw'ak, bër han këbi Kaxanu kënëbi riyeninënd, këbënëlex nëmëc andiyen andebën aņ.

## End osëfali eŋ

Eŋo ŋapëk eyëbi tēyalind do eyëbi pelënd eni di. <sup>3</sup> Angëmëne ala exo tēyalind becëxen, bend fitarëk gë eyeyan ed ðal ed Yesu Kërisët, Axwën arebi el, angëmëne axo tēfënd na bebër sëfali këmum mēne aŋapan këŋo ŋapanënd Kaxanu bën, <sup>4</sup> awa ajo ar fufën këŋo ndafënan hi ko, ar nemërak hi ko. Mokanj këŋo xanjënd ecampëre el do gë ekeÿër ed në end bëndey' bëtil el. Mondako kë ŋanand oyakëraxi ol, gë ower oŋ, gë odenar ok, do gë eyëlandër ed beñëŋëx el. <sup>5</sup> Bakucara band bela bëjo baŋ ax kwëtënd na gë ekwët. Bakucara band bër gë onden otëmbak ex, band bër ax bo ex na gër ðal ex, band bër kë yëland mēne ekwëta ed xwëta këno Kaxanu el acotëraxën ex. <sup>6</sup> Eyo ðal ex mēne, ebalëkënali ed bend Kaxanu el acotëraxën atëm ex angëmëne anëngandëra ki nëngandërand gë er šot këÿ in. <sup>7</sup> Enimin ŋoweÿ ane mëlaw exe na gër ngwën ro, bëte ŋoweÿ ane mëlaye na. <sup>8</sup> Awa angëmëne ašot këne šotënde eyamb ŋamb in, do gë banjëm baŋ, gwac ebo. <sup>9</sup> Barikan bër kë faÿënd gër oÿëkw orebën mēne afo eni gi bër gë napul bën kë wëcënd gër eñëŋëx. Bën këbi sëränd ang amene fo oñandi odanjëm, oñandi opëñirëx, oñandi oñëŋëx. Do oñandi oko këbi sëwënd eni nëxena do eni nambëra. <sup>10</sup> Enimin, aŋana and kodï aŋ ex anëmbët and gër ed kë ŋanawënd toro ind ex yo. Ata bërëmar ga ðan këni kodï in, ðawëtaxën këni ekwëta ed Kaxanu el, do sëkaxën këbi oyot odanjëm.

## Bapela bapelatar baŋ

<sup>11</sup> End wëj ala ar Kaxanu eŋ cëŋ, kwëÿëtäl beŋo. Calayind aniyän and šenene, and ðan ko Kaxanu, and gë ekwëta; aniyän and gë aŋana and bela, and gë ebuŋa, and gë onden omëngwëk. <sup>12</sup> Kaxëring okaxër onjekax ond ar xwëta këŋo Kaxanu oŋ, kwëtayal aye aniyän and din and waceli ki aŋ. Ax gi ex na nde ga šot këÿ aniyän aŋo rixën bay osede oyekax ol do wël këni otede odanjëm? <sup>13</sup> Gër lëngw ir Kaxanu, mëŋ ar këbi yëlënd aniyän ðek bebër gë onjën an, do gër lëngw ir Yesu Kërisët, mëŋ ar reÿa bax osede oyekax gër lëngw ir Poŋës \*Pilät an, këmi felënd eŋo: <sup>14</sup> kwëtayal apela aŋ do ey' bayi, aÿwënëk do ar gë end këno nëp këm xali yatir ko baŋaw Yesu Kërisët, Axwën arebi an. <sup>15</sup> Abaka ko baŋaw and këŋo ðatan Kaxanu aŋ,  
 mëŋ ar ex gë onënga do axwën owun an,  
 ar ex enim Emun an,  
 ar ex Emun end bemun an,



do Axwën ar bëxwën an.

<sup>16</sup> Mëj gabat ex ar ax cësënd na an,  
mëj ex ar lëgëk gabat gër angoben an,  
angoben and ala ax təkand na aŋ,  
angoben and elod ala ax wat na aŋ,  
angoben and ala ax kor na exo nëkon aŋ.

Mëj xwënëk enjaran eŋ  
do gë panga ind din ir din iŋ! Amen!

<sup>17</sup> Pelëralëbi bër šotëk napul ir gër ngwën ro bën, këreni dafënanand na. Pelëläbi eno kwëtand Kaxanu, mëj ar kë yëlënd dëm beŋ dek, ebo nëngandëraxënënd an. Do këreni kwëtand na napul ir kë xor ex kwët ijo. <sup>18</sup> Pelëläbi eni dind enjekax eŋ, napul irebën in gilex añësa and bandixa banjekax. Dëcarayindëlenëbi bela bën gë emëkw epešax, këreni kwëjënälind na. <sup>19</sup> Do Taŷëndëlexëni mondako napul isëm ir këni xanađ ecan ecan in, eni dëkayaxën aniyand däl aŋ.

<sup>20</sup> E Timote, kwëtayal aye er xwëtënan ki Kaxanu in. Kwëŷëtal eyeyan ed kë yepënënd bend Kaxanu el, tebël eyeyandëra ed ax bašënënd na ekwëta el. Kwëŷëtal ecampëre ed në end onangëran or fudac ol. <sup>21</sup> Bërëmar cëj, ga bani sošanand mëne ašot šot këni onangëran olo, seboxën këni ekwëta ed Kaxanu el.

Awa Kaxanu yëlëleŋun oyekax orexëm ol!